

編號 2 號

【火燒崗頂】李宜諭原作

在鄉下，鬧鬧熱熱個舊曆年一過啊忒，又伸著恬靜個生活。毋過，行過消防隊時節，會看著該一臺一臺個消防車駛出車庫停在路脣，雖然看毋著無閒直掣個身影，乜聽毋著緊張刺耳個警報聲，毋過，空氣裡背因等一息仔愛停動個電波，一種神經擱纏個氣氛。

舊曆二月係美濃人掛紙個時節，恁多年天時反常，春雨慢到，二月個崗頂燥絲絲仔，所以，第一隻拜六掛紙個臨暗仔開始，就會看著崗頂出現沖天個煙，續下來紅紅個火蛇就颯出來咧，阿姆哀啲，火燒山哩啲！消防車個身影像走相追樣春等出，警報聲在街路咻等過<sup>1</sup>，一臺、兩臺、三臺……總概出動，毋過，斷烏過後就難耐咧，高不將換手腳流掠個阿兵哥，擎等鑷仔、刀嫵膠附近個竹頭、樹仔、草劈出斷火路。

第二日打早，「轟……叮叮叮叮、叮叮叮叮」直升機個聲音就在天頂來來去去響無停。「直升機去美濃湖舀水咧啲！」美濃湖黏時鬧熱起來，大家遽遽號隻好位仔，坐下來定定仔看等直升

機在湖面舀水個景象。遠遠飛過來個直升機，會到美濃湖個時節，就會慢慢仔降下來，等到肚屎下背個大袋仔揆著<sup>2</sup>水面，佢就會煞煞膠袋仔向前拖一下正擲起來，滄滄一大袋個水就吊起來咧，續等膠這恁大袋個水晃晃激激<sup>3</sup>吊到廣善堂背個山崗頂，對半天高倒啊下，恁大袋個水黏時化做一陣白白個濛煙散淨淨。

天頂個直升機一輪又一輪、對打早飛到斷烏；山腳下消防車個水一管又一管緊洩；崗頂紅紅個影跡對山前遶到山背、對山坪遶到山頂。更深夜靜個暗晡，總會聽著竹頭燒到劈哩叭啦<sup>4</sup>響個聲，火屎就跔等風滿哪仔飛，天光時節，家家屋屋個屋頂還過大路、田肚全全係烏烏個火屎。崗頂個火日燒夜燒，山下個消防車、救護車、阿兵哥乜日夜掌等……下把仔伸著沖天個白煙，大家想愛歇睏一下個時節，紅紅個火尾<sup>5</sup>嘎又好恬恬仔颯出來，就恁樣一直愛燒到掛紙結束。

火燒山崗對環境、對山林個破壞分常大，看著劈竹頭個阿兵哥分樹杈仔劃到手膠面都血流血著，實在分人毋盼得，掛紙個方式係毋係需要鄉親好好來思考、參詳呢？

<sup>1</sup> 咻等過：音 hiu nen' go~；疾駛而過。

<sup>2</sup> 揆著：音 dud do'；碰觸到。

<sup>3</sup> 晃晃激激：音 gong gong geb` geb`；因搖晃使得水從容器中溢出來。

<sup>4</sup> 劈哩叭啦：音 pi li pa la；竹子燒裂的聲音。

<sup>5</sup> 火尾：音 fo' mui`；火焰的頂端。